



## 掃泥下

晨早出來巡學生掃泥下，睇著學生个掃法，一個擎掃把，一個提畚斗，著面掃著面講事，無要無緊，像討像毋。佢即過去拗佢人講，你食飯係一齊擎箸，一齊捧碗係無？應該愛自家一手擎掃把，一手提畚斗正著。毋過今个學生有个係真癱骨，手不動三寶。在屋下嘛無在做事。所以連掃泥下嘛掃毋會淨俐。這得個人全然擘心臺灣个未來。《朱子治家格言》頭句即講「黎明即起，灑掃庭除，要內外整潔」。朱柏廬教導子弟打早起來即愛掃泥下，頭前坪、後背坪，人客間、灶下內內外外做一下攏愛掃得佢淨俐，得子弟學勤。

勤个人食自家个力，懶尸个人伸吞口涎个份定。普通事講：「睇著毋值錢，學會愛三年」掃泥下雖然係小可个事，毋過對這會用睇出一個人做事个態度。係頂真抑係儘儘採採。成過事講：「洗面洗耳角，掃泥下掃壁角」即係這道理。有人做事認真毋使得人操煩擘心，有个不時愛得序大人唸，像係無心个禾稈人，一世人攏真難有出脫。

記得三十、四十年前，大火灶个新婦愛輪流起來煮晨早頓兼爇豬菜。輪著个人透早三、四點即愛起來煮飯款三頓，無閒遐無閒邇。歸日即像打摔鬚無歇暈。大人起來，細子嘛跔起來，略大漢一兜，即愛拗阿依鬥絞番薯、剝番薯葉。了後即愛掃泥下，起頭下掃毋會淨俐，毋過嘛係愛掃，大人落尾正過來睇掃有淨俐無？即係按自細訓練，慢慢愈掃愈淨，愈掃愈緊，人嘛愈來愈勤。嘛會曉睇頭睇尾，出社會做事，頭家攏真愛。所以毋好認為掃泥下係小事無要緊。自家个高度係由態度來決定，事無分大細，若肯認真去完成佢，即攏係大事。

作者：李秉璋

### ☆詞彙學習☆

- 【像討像毋】*ciong too^ ciong m*：好像要又好像不要。此處指要做不做，邊掃地邊聊天，馬馬虎虎，非常懶散。
- 【癱骨】*tan^ gud^*：懶惰。
- 【手不動三寶】*shiu^ bud^ tung^ sam^ boo^*：原指家境良好，不用做任何家事。現指在家被慣壞，什麼家事都不會的人。
- 【《朱子治家格言》】*zhi^ zu^ chi ga^ ga^ ngien^*：明朝末年朱柏廬寫給其子弟的家訓，此書從日常生活到做人處世皆有深入淺出的道理。
- 【小可】*sio^ koo^*：稍微、一點點，在此指小事一件。
- 【頂真】*den^ zhin^*：仔細認真。
- 【禾稈人】*bboo^ gon^ ngin^*：稻草人。在此指一個人做事不用心，馬馬虎虎就像行屍走肉般。
- 【出脫】*chid^ tod^*：出息。能夠脫穎而出，獲得成就。
- 【豬菜】*zhi^ coi^*：以前農家常煮番薯葉或是蕃蓬菜、雞腸菜之類給豬吃，因此這些東西統稱豬菜。